

Thursday, November 13, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

CM

Chief Minister Pu Lalduhoma hovin vawiin khan NCC Mizoram Group Headquarters din tura hmalak mek chungchang sawi ho a ni.

CM Pisa-a hun hmanah hian Sports and Youth Services Minister Pu Lalnghinglova Hmar leh official pawimawhte an tel a, Mizoramah hian NCC Unit 4 leh Cadets 8000 an awm mek a. Silchar Group Headquarters atanga enkawl thin an ni.

Kumin July thla khan NCC thuneitu sangin Mizoram Group Headquarters hi Mizoramah ngei awm tawh se an tih angin Mizoram sorkar Council of Ministers chuan September thlaah kha a pawmpui a. Tunah hian inbunna hmunhma leh an mamawhte ngaihtuah mek a ni.

NCC kalphungah Unit zawng zawng hi NCC suma an enkawl a ni a, Group Headquarters erawh hi chu an awmna state sorkarin a ngaihtuah ve thung a ni.



BJP CANDIDATE

BJP Mizoram President Dr K Beichhua chuan vawiin khan LADC MDC inthlan lo awm tura an candidate mi 8 te a puang.

BJP Mizoram President Dr K Beichhua chuan an party pisa ah thla thar December ni 3-a Lai Autonomous District Council a, MDC General Election neih tura MDC bial 8- Chawngte P, M Kawnpui, Sangau East, Sangau West, Bualpui East, Bungtlang South, Sekulh, leh Sakeiluia BJP Party Official Candidate tur te a puang a. Akashvani News Aizawl zawhna chhangin, Dr K Beichhua chuan a thawhkhat nan candidate 8 te hi an puang phawt tih sawiin, naktuk hi hming thehluh hun hnukung ber a nih avangin tlai lamah chuan candidate puan hmabak te chu puan hman an ring a ti a. LADC knthlan lo awm turah hian Party dang nen thawhho tumna an nei lo tih a sawi bawka a ni.



NATIONAL TRIBAL DAY

Mizoram sorkara Planning & Programme Implementation Department chuan November ni 14 leh ni 15 hian Raj Bhawan, Aizawlah State-level Commemoration of Janjatiya Gaurav Varsh 2025 a buatsaih dawn.

He hun hi sorkar laipuia Ministry of Tribal Affairs hnuaia neih tur niin, chawhma dar 10:00 atanga hun hman tan a ni ang.

Naktuk November ni 14 a hun hman turah hian Mizoram Larsap General (Rtd.) Vijay Kumar Singh chu khuallian a ni dawn a, Mizoram sorkar chuan mi

zawng zawng tel tura sawmin ram tana zalenna sualtu leh tribal tana tha thawh hlawk leh mi hmingtha te chawimawi an ni dawn a, Mizo hnam lam entir a nih dawn bakah zai ngaihthlak tur a awm bawk ang.

November ni 15 hi India ramah chuan National Tribal Day a ni a, Indian tribal freedom fighter Bhagwan Birsa Mund-a pianchampha puala neih niin, kum 2021 atang kha India sorkar chuan hemi ni pual hian hun a buatsaih thin a ni.



BLIND FOOTBALL

Mizo Mitdel tlangval rual, Mizoram Blind Football Team chu Greater Lion's Vision Cup 2025-ah an champion.

Siliguri, North Bengal-a inelna neih zawh takah hian, Mizoram hian final-ah West Bengal chu 3-0 in an hneh. Inelna hi Indian Blind Football Federation hriatpuina hnuaiah Football Association for The Blind in Bengal (FABB) leh Lions Club of Siliguri Greater-te tangdunin a buatsaih a ni.

Mizoram team hi an lo haw tawh a, Mizoram Blind Sports Association (MBSA) hruaitu leh mitdel football ngaihventu thenkhat ten an lo hmuak. MBSA President Lalrampana chuan Mitdel infiamna ngaihlua ngaihventu kalkhawmte leh tlang hrang hranga mitdelte hmakhaw ngaitu Mizo mipui zawng zawng chungah lawmthu a sawi a ni.

Byte: Lalrampana, President, MBSA

Mizoram Blind Sports Association hian kum 2023 atanga mitdelte infiamna kawnga hma an la a, Womens Blind Football team te chu kum zawna champion an lo ni tawh bawk a ni.



RICE HARVESTING

Tunlai hian Mizoram hmun hrang hranga lo nietu te chuan buh an seng mek a, Khawzawl District chhung Tualte khaw chhuak Pu Lalnunmawia chuan buh a thar tam hle a, a buh thar zat hi teh chian chiah la ni lo mah se Tin 4000 bawr a thar a rinawm a ni.

Pu Lalnunmawia hi Aiawl Bungkawna cheng a ni a, kuminah hian Tualte Artlangah hian Tin 17 hmun a zauah buh Tin 25 vel a tuh a. Kuminah hian Sazu puang leh ruahsur nasa vangin buh chingtu tamtakin harsatna tawk mah se, vanneihthlak takin harsatna lian tham an tawk lova. Buh hi thla hlui October chawhnu lam atang khan vaw tanin tunah hian an chhungkhawm mek a, an thar zah chiah hi ala hriat theih rih loh a ni.

Tuna hriat theih chinah Pu Lalnunmawia hi Mizoram a buh thar tam ber nia hriat a ni.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm baw ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.

